

■ COLUMNA

A mintgin il sieu

DA FLAVIA HOBI

Bain, qua hai jau da ludar mia sora. Pli baud, sco mattatscha, era ella detg heiclia. E mintgatant sche nus eran sin visita eri prest in zic penibel tge ch'ella n'aveva tut betg gugent – la fin finala ha l'envidader dà tutta bregia. Ma entaifer ils davos onns ha ella fatg in svilup remartgabel. Schuppa d'agl urs, salata d'erva e tschut a Minca, ins stoppia doch empruvar. Nus avain tuts sminà che la salata d'erva na vegn betg ad esser la sia, aber eba, empruvar pon, dastga, stuess ins ed uschiglio gidan bab e mamma da mangiar. Ah, e sche nus hajan vin da Riesling, ella vuess far ina schuppa da Riesling! Ella ha lura vairamain fatg ina.

Che uffants mangian il pli gugent simpel n'è betg nunenconuschent. Mes pitschen vischin m'ha ditg ch'el prefereschia «Spinatplätzli», probabel quels da la marca Findus. Era san



ins che verdura n'è il bler betg la gronda favorita e cun finotg u artischoccas pudessi esser grev da punctuar tar uffants. U in'amia da mai n'aveva betg gugent tartuffels ed era cun tomatas na stuev'ins betg vegnir. Ma «pommes frites cun ketchup», tge buntad!

Apropos «pommes frites» – quai è tenor mai vairamain ina delicatessa. Avant che pasta, pulenta, ris, risotto, buglia da tartuffels, tartuffels a vapur, brassads u or da l'aua èn pommes frites mia nr. 1 sco garnitura tar la charn. Oravant tut quests ch'èn in pau pli gross, croccants, bun

cundids cun spezarias. Quels dal McDonald's èn prest in pau memia fins. Ma – eba era grazia a McDonald's: pommes frites datti sin l'entir mund. Uschè pon pommes frites schizunt gidar encunter encreschadetgna. Dentant, tar ils pommes frites dovr jau exnum u per plaschair era ketchup vitiers (jau sai, mintgatant para quai forsa senza stil).

Però gea, en general sun jau sa chapescha era da l'avis ch'ins stoppia empruvar chaussas, spezialitads, cunzunt en autras terras. Quai fatsch jau era gugent. E grazia a la globalisaziun san ins senza problems era mangiar tar nus internaziunal – indic, libanais, giapunais. En sasez hai jau mirveglias co ch'i fiss stà da mangiar sushi u humus cun mes tat. Jau ma dumond sch'el avess pruvà e sch'igl avess gustà ad el. Tgi sa sch'el avess perfin mangià il sushi cun ils fistets? Speranza betg cun ketchup.